



COMUNICAT STAMPA

Mostra de pësc y saurs dl Triassich dala Cina dl Sud: paleontologhes cinëisc en vijita tl Museum Gherdëina

Studiëusc dl'Università di Pechingh a Urtijëi: "I fossii dolomitics nes dà n cheder plu ntier."

N cheder dla vita tl mer dan 240 milions de ani pudons mé nes fé tres i fossii y de gra a na culaburazion internaziunela che tol ite raions deferënc y dalonc l'un l'auter. Chisc dis nfati, ie ruveda adalersch tl Museum Gherdëina a Urtijëi na delegazion de 30 paleontologhes y geologhes danter professëures y studënc dla Università de Peking. Tlo a Urtijëi iel al mumënt da udëi la mostra de vertebrei marins dala Cina dl Sud che fej da cumplemënt ala mostra permanënta de curëc y fossii dl Museum Gherdëina. "I reperc giatei su tla Dolomites y da nëus tla Cina meridionela, sce tëuc n cunsciderazion adum, nes pieta n cheder plu ntier dla vita tl Triassich", à dit i esperc cinëisc.

Cun a cë l professëur Jiang Dayong y acumpaniei dal curadëur dla mostra, l professëur Andrea Tintori dla Unviersità de Milan, à i paleontologhes de Peking (Beijing) pudù se fé n cheder plu sot di reperc mpurtanc unic a lum te Gherdëina y dl paesaj geologich dla Dolomites.

L nteres nasc nia per cajo: i fossii dolomitics de pësc dl Perm ie danter la plu vedla testimonianzes dla vita tl mer antich, l Ozean de Thetys. De mpurtanza particulera ie sëurapro i restc dl schilet dl gran itosaur abinei sun Secëda y cunservei tl Museum Gherdëina, che ie unit cunfermà de vester l plu vedl itiosaur al mond. Sun Secëda ie i paleontologhes cinëisc unic acumpaniei da Hans Compj y Meinhard Strobl a se cialé ju da daujin la furmazion geologica ulache se ova cunservà chësc vedl retil marin. Autra escurscions à i studiëusc cinëisc mo fat sa Bula, sun Secëda y sul Pordoi; sul program ai mo na jita tl Bletterbach dan furné in de reviers tla Cina tres stazion a Milan.

L gran nteres desmustrà dala Università de Peking per i fossii de Gherdëina à da n fé cun la parentela geologica y paleontologica strënta danter la Dolomites y l raion dla Cina dl Sud. Tramedoi paesajes, defati, fova dan milions de ani curii dal medemo mer antich. "I fossii cunservei tl Museum a Urtijëi cumplementea l cheder de nosta giavedes tla Cina meridionela, davia che i vën ca da n tëmp plu vedl nia representà pra nëus tla Cina", à spiegà l professëur Jiang.

La giavedes che vën fates da n valgun ani incà a Xingyi, tla Provinzia di Guizhou, à purtà a lum miliesc de fossi dl tëmp dl Triassich: 30 de chisc esempleres de marueia, danter pësc y retii dl mer, vën mustrei per l prim iede tl uzidënt y ie mo da udëi nchin ai 27 de lugio tla mostra tl foyer dla Cësa di Ladins a Urtijëi.

"L mprëst de chisc reperc per chësta mostra itineranta cunferma l gran nteres da pert dl'autoriteies cinëijes locales per fé cunescer oradecà si patrimoine de mpurtanza scientifica, coche desmustrà dai trueps articuli publichei sun l material de Nimaigu", à lecurdà l professëur Jiang. Sëurapro, "se augurea la autoriteies cinëijes de pudëi crië n cuntat nia mé scientifich ma nce turistich danter la Dolomites y l raion de Xingyi, ulache de setëmber unirà tenì n cunvëni sul turism tla montes. I crëps de tramedoi raions ie fac de ciauc, ënghe sce morfologicamënter iesi dastramp deferënc l'un dal'auter", al finà via.



Da pert dl Museum Gherdëina ti iel unit sëurandat al professëur Jiang Dayong n diplom de recunescënza per la culaburazion al mprëst di fossii dla mostra. Nfin à la delegazion cinëija mo pudù se to pea mprescions dl'ert y dl artejanat dl ziplé de Gherdëina tres la vijita ala mostra dla UNIKA y ala culezions dl Museum Gherdëina, coche nce dla mujiga y dl bal polpuler tres la bela desmustrazion da pert dla grupa di Balarins de Gherdëina de Urtijëi, che à abeli l'ancunteda tla Cësa di Ladins.

La mostra speziela "Pësc y saurs dl Triassich dala Cina dl Sud" ie mo davierta nchin ai 27 de lugio, y fina via n chësc di cun na vijita meneda y na jita geologica sun Secëda cun l curadëur professëur Tintori. Bele ai 20 de lugio, iel mo n'otra jita geologica cun i scuvridëures dl itiosaur, Johann Compoj e Meinhard Strobl, te Val d'Ana.

A tramedoi jites possun se scrí ite tl Museum (tel. 0471 797554, mail info@museumgherdeina.it) y pra la Lies dl Turism de Gherdëina.

Per deplu nformazions:

Paulina Moroder

E-Mail: p.moroder@museumgherdeina.it

Tel.: 0471 797554

Cell.: 338 6040477

Museum Gherdëina, Cësa di Ladins, streda Rezia 83, 39046 Urtijëi